

第十五本
敦行二
忠義

新修江寧府志卷之三十六

人物志三 敦行

晉顏含字宏都建康人以孝聞兄畿死而復生累月猶不能語含躬親侍養足不出戶者十三年畿竟不起初爲上虞令尋以儒素篤行補太子中庶子事詳晉書孝友傳

梁張松建康人兄坐罪當死松及弟景各欲自代縣以讞上武帝以爲孝弟特宥其死

宋秦熹者其先自南泉徙居秣陵爲人長者歲收租萬斛鄉民輸粟每令自行概量間捐之鄉人德焉當熙寧

新修江寧府志

卷之三十六

敦行

一

元豐間頻歲饑饉作米粥以飼往來之人計升斗以給乏絕之家全活甚重有司聞而薦之不起

高志崇句容人歲饑發粟賑鄉里自縣治東北至鎮江府山石犖确行者病之崇率衆鑿平之遇澗造橋梁數十所

王進德字仁甫金陵人金陵郡庠燬進德構講堂并治器具費七萬餘緡賣宅一區割田九百畝創建江東書院置義莊以瞻親族修城隍以捍井田人咸利之元郭淵字巨川六合人宋季盜興淵聚族爲堡以保其鄉大德末淮南饑爲粥以活流民

明周祓上元人明太祖兵渡江祓具糗糧以迎正統間其孫鏞出粟賑饑旌爲義民

李疑金陵人金華范景淳爲部吏隻身得疾人殆之莫肯僦舍使居疑獨延之入室躬爲治藥旣不能起且日爲浣滌衾席淳涕曰累君矣恐不復生無以報德囊有黃白金四十餘兩願自取之疑召其子還之平陽耿子廉械逮京師其妻孕將育衆皆拒門不納妻泣臥草中疑問故歸語其婦且曰倘產而爲風露所中則母子皆死矣俾婦邀之以歸

笄克容句容人洪武時輸粟千石助邊

新修江寧府志

卷之三十一

敦行

二

張觀字國賓句容人弟謙洪武中有與謙同姓名者坐事自經有司誣執繫獄觀上訴不白俱論死罪謙臨刑曰我被誣命也奈何及兄觀曰兄弟急難我拯弟冤死何憾焉觀者莫不泣下

陳義上元人溧陽徐尙書潛匿建文事發籍其家有幼女發教坊司義陰庇之得不辱後遇赦義爲嫁之鐵尙書二女義亦保全俾從良焉

龐玉上元人宣德間爲萬石長值歲歉租稅皆不取盈有司或詰之公曰民不康食吾何忍焉吾寧輸粟以給上有司爲減征民賴以生成化壬寅歲饑輸粟二百五

十石賑荒詔嘉其義

王指揮上元人世襲虎賁衛妻死不娶與母居孝養備至有同官黃某遠謫久不通問其妻貧不能存成國公朱儀憫之且知王喪偶欲以黃婦妻之召王母語之故王母唯唯蓋成國乃其主帥不敢拒也婦既歸王王與之異寢處居數月黃母偵知之往告朱公儀隨召王詰其情王曰其夫固枉若與同寢他日何以自明且彼失節卽某失節也請於成國遣其家老奴夫婦送婦之謫所且給之貲成國亦賜遣之

何岳字畏齋畱守衛籍嘗夜行拾遺金二百鍰凌晨至

新修江寧府志

卷之三十一

敦行

三

故處有尋至者諮而還之又有高仲光者豹韜衛籍奉檄資疏入都投旅邸得遺金一囊因止宿焉明日客始至且泣且訴仲光取而付之

孫友忠朱濱皆句容人正統九年各出穀二千五十石

賑饑

笄均祥句容人正統六年捐粟一千石賑饑

唐得全句容人正統景泰間賑粟三千石

朱雋字惟潤句容人正統間歲祲出穀二千五十石賑

饑

任義字淑禮溧水人正統間歲大饑義出穀二千餘石

以助賑事聞旌爲義民子思德天順二年納粟八百石
拜義官孫三人長清甫正統辛酉賑粟四千斛詔旌其
閭乙亥復賑粟二千石施棺木千餘次和南景泰三年
運粟四百石赴北京次華甫景泰五年設粥于城隍廟
活饑民千餘人

胡瑛字叔達六合人正統五年歲大歉與弟瓊珣出米
一千一十石賑饑

金貴六合人世居學宮南將廣學宮貴乃徙他宅讓其
址子盤益正德間助修學宮

孔安高淳人醇謹好義正統初歲荒出穀二千石助賑

新修江寧府志

卷之三十一

敦行

四

劉鑑三孔份三夏祐三皆高淳人并倜儻有爲淳原隸
溧水縣距數百里詞訟稅糧必由石臼湖赴溧風濤爲
患民甚苦之三人籲請分設縣治故時有三三分縣之
謠又南塘圩爲永豐圩外灘宏治二年鑑三力請於當
事築埂開墾遂成沃壤二萬餘畝

姚讓字文敏上元人性樂施與凡貧不能葬其親死無
棺殮及轉徙流離無所依者立爲周濟其橋梁道路有
廢敝者聞見所及卽爲修葺之

孔彥懋句容人景泰間赴通州納米三百五十石以助
軍需

趙慎句容人景泰間燕民大饑出粟四百石助賑
凌溥凌泮句容人修建學宮造橋梁與姪倬並出粟賑
饑

周禧句容人涉江有溺人觸舟急援入舟中久之乃甦
詢知爲漁父遂返棹數十里訪還其家

湯景時句容人祖居在儒學前正德間將廣學宮景時
與弟景春不受值而讓地

高傑句容人性長厚不與物忤有樵者悞以擔觸其目
瞳隨擔出血流滿地昏瞽中猶謂樵者曰吾兒年少汝
亟西行無爲若所獲頃三子至索其人傑則曰已東行

新修江寧府志

卷之三十六

敦行

五

矣其子追數十里不遇而返

戴文冠字正生句容人性孝友樂施族有人訟文冠痛
哭於其家廟族人感泣訟乃不終有戴元憲者爲捕役
所迫遂以眞盜自誣且稱里中寄贓者三十餘家文冠
勸令勿枉無辜乃可自活受誣者賴以獲免

戴谷安句容人兄弟二十二人同居正統景泰間出粟
二千餘石賑饑

徐宗正句容人性孝友以已所應得之產盡讓於弟創
宗祠立義倉捐穀千石以贍宗族

趙琪溧水人弱冠喪父撫二弟同居宏治間嘗兩建蒲

塘橋費至數千餘金

陳翥高淳人宏治四年京兆冀綺行度縣基翥議建於鎮山之陽筮日起土術者謂首事人必死衆皆避去將以重囚當之翥奮然曰此事可屬之罪人乎翥請以身禱三日竟死京兆奠而葬焉未幾卜學基於葬所京兆指而問之知爲翥墓則曰生且以身殉邑死寧不願以塋讓學宮乎遂遷葬之

吳嘉珉高淳人治六經不求祿仕好施予破產不悔宏治中卜建學宮珉捐墓地遷葬以讓之

孫暄高淳人性慷慨仗義宏治中初卜建學暄盡捐所

新修江寧府志

卷之三十六

敦行

六

有縣北地以讓焉

楊朝宗字見卿上元人嘗館於徐氏有友易某貧無以自存將之汴朝宗曰道路遙遠人心莫測適有可托足之地能少畱乎易遂止時徐姁有杜兵部者將令其子從朝宗學朝宗遂以讓易而易更欲得朝宗之館陰謀奪之朝宗知之遂託故辭徐而舉易自代會正德間修郡志人將列其事朝宗亟止之曰揚友之過以成己名君子弗取也事遂不載

張整溧水人正德三年大饑出穀千石以賑里人

陳達字宏道六合人正德間襲忠義左衛指揮同知景

泰間陞都指揮同知鎮守通州天順二年晉階都督同知痛于少保謙爲權奸所構密賂守者收其屍瘞於城西淺土後更備棺衾付其子冕歸葬事附明史于謙傳俞莊字敬夫六合人正德七年任浙江温州府訓導陞河南伊陽教諭修祭器置官書鬻馬以濟窮乏陞魯府東阿王教諭子佾捐貲埋骼鄉里稱善焉

張倫字世序高淳人正德九年荒穀價湧貴倫捐困濟饑全活甚衆嘗以美田宅讓其弟自搆敝屋居焉

邢璨高淳人性誠篤務施濟正德五年大水出粟賑濟廣施葯餌死者輒給以棺

新修江寧府志

卷之三十一

敦行

七

趙善繼上元人嘉靖間民苦坊甲之役破家殞命者相繼善繼奔走陳訴已而疾苦漸達於諸權要會郭給事具奏得請民困以甦卒祀惠澤祠

李曉字子晦江寧人師蔣某旅卒家貧曉逆其喪歸葬焦文傑字世英江寧人通州吳主簿寄部糧八百金於傑吳暴卒文傑舉金還其家仍爲之護其喪歸

武鍾溧水人嘉靖二年旱鍾出穀二千餘石賑饑又建三清堰望湖山二橋子濡建通津橋又修天生橋欲置義田不果其子曰曙曰易曰煦出腴田三百畝爲崇正書院義田上官欲獎之辭曰此父志也煦子尙敏亦以

孝友聞于鄉

陳譙字睿之溧水人捐貲助修學宮治城郭又置學田廣醫學嘉靖乙酉丙戌邑大饑出穀萬餘石賑之

吳澍溧水人嘉靖三年歲大饑死者相枕藉澍乃荷鍤行埋瘞露骸不下數千

袁愉溧水人嘉靖三十七年捐資助造邑城

陳廷瑄溧水人身長八尺辟易千人嘉靖癸亥間島夷入寇徑村口廷瑄方獨立門外并傍絜汲水輪以示武意氣閒暇賊衆望而眙聘遂不敢侵嘗值凶歲凡三捐穀以賑饑

新修江寧府志

卷之三十六

敦行

八

邢瑰字廷美高淳人嘉靖甲辰大歉代邑人輸賦且出粟賑饑贖罪徒八十餘人施棺置義塚孝子宋德以救父誤傷人瑰爲辯明得未減閩中王某流落江南以獲罪鬻妻瑰爲之代贖閩人陳某以病來投隨卒瑰厚葬之又胡達等以盜屬株連瑰爲申解長子世橋嘉靖八年捐粟千石助賑次世榮官兵馬司嘗築襟湖堤造永濟橋孫繼本見前仕績傳

孔惺高淳人嘉靖間歲饑惺出穀賑貧施棺掩骼族中貧者爲婚嫁焉

史希仁高淳人事母孝母以已姪爲嗣及析產以膏腴

讓之嘉靖辛酉大水出粟賑饑全活甚衆

秦漢高淳人嘉靖十七年諸宦者奉梓宮自承天至南都郡邑皆有餽獻時淳令陶某獨無備衆遂擁陶去拘於一室人莫敢救漢曰吾當力返之乃衣錦衣乘馬往關戶出陶負以上馬絕塵而去復代陶攜金致諸宦者遂得無恙

孔鎬高淳人慷慨尚義出粟賑饑嘉靖間捐貲告復馬場田省驛傳銀

周儒高淳人嘉靖甲辰大饑儒爲糧長代貧戶償稅三百餘金庚戌大水捐穀八百石賑饑有楊某鬻妻予金

新修江寧府志

卷之三十六

敦行

九

贖之凡貸不能償者輒焚其券

魏侑三高淳人慷慨仗義爲馬場事奮身仗闕得斷復相國等圩田六千六百餘畝後名宣馬田閭邑賴之其四世孫名繼倫者萬歷三十六年水災出粟二百石濟

饑

邢科高淳人好施予嘉靖八年捐粟千石助賑

劉輅高淳人嘉靖丙戌荒捐穀千石賑饑孫鵬亦好施

濟

沈九思字天啟上元人言行間皆恂恂以古人爲法里有勳貴爲賀黃門涇所持橐金求九思爲解九思拒其

金而陰爲解之伯子鳳翔成進士居官以廉能稱
鄺典上元人館於尹氏羣盜乘夜猝至重門不得開乃
摔典令呼以入典不可盜以刃迫之典大言曰吾館於
若乃爲爾輩啟門以劫之豈復有人理耶盜不得志乃
掠生衣物且縛之逮明乃得解

馬上圖字文先上元人友人之妹貌陋而跛年及四十
媒妁不一顧應圖獨娶之以侍母養鄉黨義之

劉體德上元人驛郵素無常卒輒取民殷實者更之愿
者遂致破產以饜胥吏體德憤白之臺憲遂以上聞乃
得所請又吳商席氏者怨家誣以寇謀株繁逮二百餘

新修江寧府志

卷之三十六

敦行

十

人體德悉其冤憤激營救獲解會流寇薄江上上防江
十二策又請于本兵捐建敵臺寇卒不敢窺江歲饑賑
糜救斃民子自慊性醇謹以文學名

徐鯨字樂野江寧人嘗修方正學祠墓及安德門至新
亭岡大路

卜璠字樸菴江寧人嘗攜貲卜地牛首山中見負戴者
苦暍卽以其貲穿井井在鐵心橋又嘗過一橋下聞哭
泣聲則夫婦逼於債攜幼子欲自盡也璠捐金救之明
年往吳江舟覆攀木登岸至一家叩門求宿主人出則
卽昔之橋下人也深獲其濟孫履吉見前仕績傳

錢自強字仁郊上元人有村民貿易橐金寄之而去久之不至自強詣其家已死數月矣乃召其妻子悉以所寄還之

周卿字宗政高淳人母靳氏遺孕七月而生卿甫六歲言及父輒泣涕家貧事母極孝得甘旨輒奉母有餘卽卹親族

張著字一明高淳人性孝友歲荐名在兄先著謂兄遲莫固以貢讓之後官順德府判遷均州守以慈愛稱柳夢陽高淳人偕兄鄉試兄病躬治藥餌遂不赴考以貢授汝寧府訓導致仕歸倡議疏鑿胭脂河

新修江寧府志

卷之三十一

敦行

十一

吳允才高淳人以孝友稱父被難百計求解竭力事繼母撫幼弟後以貧卒人共悼之

周慎字尚禮卿之子慎以歲薦入成均有贈之三十金者見道路流民及露骸未葬者周之比至家僅餘數金適鄰以追比將鬻妻復傾囊助之後官蘄水令有清操邢繼芳高淳人任湖廣畱守經歷署沔陽州篆築沙陽堤民甚利之以母病歸愛弟讓以公產姪貧又割產助之

魏涑字維源高淳人嘗宿邸舍有女來奔拒不納

張蕘高淳人事母孝母好施蕘備物以順其意官龍游

亟捐俸造獄舍修橋路賑貧恤孤奉命至京師遇閩人
虧官銀泣甚哀傾囊予之

孔忱字思信高淳人性嚴正嘗出粟賑饑捐貲修學累
官寧州同知

邢世仁字良性高淳人性孝友官錦衣千戶時大金吾
某擅擬疏論衆世仁力沮之會以母喪歸捐地置宗祠
周恤貧困

韓邦本字子固高淳人邑故有虛糧爲民患兄邦憲捐
千金倡衆請減適夜歸遇盜邦本趨盜所願以身代盜
義之因得釋邦憲後爲衢州守病卒邦本奔赴之諸司

新修江寧府志

卷之三十六

敦行

十二

共致賻邦本曰不可以是污兄清白悉却之以謁選任
大寧都司有治聲

邢繼康字惟泰高淳人宗人某瀕死以幼子屬之撫至
成立族子某没人異姓贖之歸嘗捐貲修橋梁歲侵出
粟賑族又捐穀六百石建義倉後官大寧都司捐俸置
田以歲入治糜療饑焉

陳三策高淳人父時弼好施策承其志歲歉有鬻妻與
子者皆捐金代贖父之友某貧苦無家授室居之
劉室高淳人嘗捐田百畝爲義田又置義塚施棺埋骼
築永豐南蕩二圩堤民咸利之

甘元章字文南高淳人嘉靖癸巳邑有路以水漲成渠人病徒涉乃捐資造石橋更甃墁道路築堤成圩以濟行旅

吳正二高淳人兄爲糧正虧額出亾正二毅然代輸旅次拾金百兩俟遺者至還之

邢仕徵字久我高淳人年十二從父之任父卒奉母扶柩歸捐貲修路嘗建石橋成術者云先行者必亾仕徵瞿然曰吾欲濟人反以病人耶先徒步往後亦無恙

湯銑溧水人時上元江寧句容溧陽高淳溧水六縣分養官馬并淮揚二部寄養官馬共計四千一百五十匹

新修江寧府志

卷之三十一

敦行

十三

重爲民累隆慶戊辰銑自賚疏叩閭極陳其害遂奉旨革除六邑咸受其利又高淳韓邦憲等飛糧八千五百石加于溧水銑獨銳身發其奸人咸義之

邢世文高淳人嘗代人贖罪又捐貲建明倫堂歲稔出粟賑濟

陳旻高淳人性孝友族有侵官賦者旻棄產代償之有程某鬻妻女富室妻屢被笞幾死旻爲稱貸贖之

陳文心龔廷機楊鑑皆溧水人萬歷十六年歲大饑共出穀千石以賑之

楊鳳岡溧水人萬歷十六年崇正十四年凡再捐貲賑

饑賴以存活者甚衆

端木彬溧水人萬歷戊申大水倡義賑濟置義田八十畝凡族子誦讀婚喪莫不相助

孫爆字少岡溧水人嘗設舟梁又鬻櫂埋柴萬歷三十七年邑大水捐貲以賑邑令每給帖貧民令赴孫領粟日數十紙爆應之無難色

經應緯字旋宇溧水人萬歷辛巳歲頗有秋獨贊賢一鄉被蝗貧者苦之應緯於每戶稅銀三錢以下者皆爲代納計銀一千五百兩有奇

楊巘字秉獻高淳人嘗鬻產代人納國課鄉里義之

新修江寧府志

卷之三十六

敦行

十四

邢繼寬字性嚴高淳人官貴州經歷讞沙鋪王嘉猷殺人大獄一訊而服尋以母老歸萬歷戊申大水寬積粟十困有掠之者官將置法寬悉爲求釋子仕乾字健甫性孝友著有歷代帝王世系圖考職方備覽等書

孔一望高淳人性至孝好施萬歷戊申大水出粟賑饑劉存德字崇吾高淳人設里塾濟窮乏萬歷間捐貲修築長慶圩

夏匡靖字寧華高淳人有鄰婦來奔靖竣拒之且曰豈爲貧耶吾且贈汝婦慚去卒與之粟三石歲除賊入其室與以米使去萬歷間邑大水湖田屢遭衝決靖請於

當事疏請減稅後官寧夏都司經歷

李瑞春高淳人性慷慨萬歷戊申水荒出粟三百石賑饑崇正辛巳旱倡捐賑濟暴露者悉瘞葬之

楊國惠高淳人性醇謹好施予萬歷間水災鬻產賑濟徐機高淳人好施予萬歷三年有邵武軍裝貼之累機捐腴田二十畝於公取租以應軍需餘以葺宗祠葬埋胔骼

陳九數高淳人萬歷十四年大侵出粟賑饑且施棺槨徐洲高淳人萬歷戊申水災施糜救饑

孔貞言高淳人萬歷戊申大水捐穀三百石賑濟

新修江寧府志

卷之三十六

敦行

十五

孫琦高淳人嘗沿湖築堤以衛永豐圩萬歷戊申大水棄產糴粟二百石助賑

唐世賓字敬渠高淳人嘗積金三百貸於人會萬歷戊申大饑悉焚其券

徐廷祿字千鍾高淳人居湖濱每遇風浪力救漂溺凡貧無依者給之薪水死則葬焉萬歷大水出穀百石助賑

劉鴻緒字裕之高淳人慷慨好義萬歷壬子圩破緒傾家賑粟乙卯又荒置義田以贍族人

卞司儀溧水人捐貲修建文廟出錢千緡糴穀貯惠民

倉邑之南城崩數十丈獨捐資任其役

蕭韶溧水人性純謹孝友縣立義倉嘗輸粟以充公
傅洲高淳人邑褻治糜飼饑嘗置義山施棺木掩埋暴
骨子汝達以孝聞

陳九品字惟擢高淳人性至孝平時有齷齪之者每言
之輒流涕諸子叩其人則曰而知之終將銜之無以爲
也

劉良國高淳人歲大侵鬻產濟貧四十無子買妾趙氏
詢知其有夫與子亟遣還不取其價

陳毓靈字自西高淳人性至孝娶妻不慧或勸更擇毓

新修江寧府志

卷之三十六

敦行

十六

靈曰中饋之事已能任之如是而已不從

沈繼初高淳人嘗瘡胭脂崗以消水患後任浙省勤邑
主簿築堤利民

陳時柏高淳人與諸商往鳩茲值風覆舟柏奮身拯救
多人并獲貲數百悉還諸商已橐盡失不顧

夏霖字伴松高淳人七歲失怙事母至孝因淳邑虛糧
受累霖毅然請於當事得減折民困稍甦

邢如斗字觀之高淳人初任惠州府經歷調樂清主簿
歲大旱舊傳雁宕山石潭有龍禱之輒應如斗冒酷暑
徒步百里始及潭禱後不越日而雨

李華岳高淳人年尚幼見年興圩爲湖波衝激一潰六圩皆成巨浸乃力請於大父思九捐千金修築又鬻田三百金與祖孟八建橋龍興津人咸利之

陳時升字雲衢高淳人嘗典衣歸金倍於數輒還之有友家被焚倉惶寄一笥經歲不取友蓋悞以爲煨燼矣升卒歸之封識如故

趙一鯉字百屏高淳人有鬻妻者方泣別鯉贈以金俾完其室萬歷戊申大水買穀鳩茲將歸平糶舟抵黃池見有男女赴水者救之詢其故知因負債將鬻妻以償而又不忍離焉故同就死耳鯉出穀與金周之並償其

新修江寧府志

卷之三十六

敦行

十七

負

夏邦樂高淳人事母孝嘗見溺尸典衣爲殮有鬻妻者助之貲以全其偶遇饑寒者悉周之

張正楷高淳人嘗修小公口官路太學黃羽定爲人所中幾成大獄楷陰爲之解

夏景高淳人萬歷間兄受枉擬大辟景貌與兄似願以身代兄涕泣止之不得卒慷慨就刑

何調元字君佐高淳人客宣州有湯某遺金三十元獲之俟竟日湯至遂還之湯受金泣且拜曰買婦輸租婦去而金復遺將就死耳今君見還是再生也將何以報

元卒亦不告姓名而去

劉定瀾高淳人修築廢圩歲稔出粟貸饑又捐田二十畝以贍族人

陳明養高淳人歲饑施粥濟貧永濟橋圯明養捐貲建之

鄭宗化字尙德上元人性至孝居異母喪終制未嘗見齒平居講學不倦子元厚字載之亦以博雅方正知名陶栩字思崗溧水人天啟崇正間歲大饑栩出粟按名給散

王應禎溧水人性謹厚以孝友聞天啟間大水出穀賑

新修江寧府志

卷之三十六

敦行

十八

饑全活甚衆居恒濟人困急隱而不言

宋公庭字鳳竹高淳人天啟四年邑大水公庭從淮揚市粟數百石賑濟

劉定富字我雲高淳人天啟癸亥潦永豐圩崩居人田舍盡沒富捐資修築之姪達名遇盜棄子全姪鄉里尤義之

陳灌號樂愚溧水人捐金三百造西城樓櫓子景福捐貲助修文廟及徽恩閣

張曉熊子成溧邑之有幹略者也溧水舉改折漕糧之議二人挺身走京師詣闕疏請爲一邑利

張文禮弟文德句容人一乳而生長益友愛文禮卒文德悲痛不食亦卒卒之日曰我死當與兄同穴遂合葬焉後同里有居安字處謐居莊字處端亦以友愛聞安嘗謂莊曰薄俗兄弟異居吾與汝至死亦當同穴遂亦合葬

李應科號少塘太學生慷慨好義人以緩急告者靡弗應卽多逋負不以介意輒焚其券

蕭濟溧水人捐穀百石助設冬生院養無告人偕兄弟渡溧修造城隍并泮宮石坊居常周貧恤孤邑罔不遍陳溧溧水人拾遺金諮其人還之疾亟取平生貸券召

新修江寧府志

卷之三十一

敦行

十九

其子焚之曰吾畱此倘汝曹持以索償不得必遺訟端勿若畱德與汝勝遺金也

翟翬字去文京衛籍性孤峭不妄言笑羣居燕集談辨風發翬獨默然痛闖獻禍作棄妻子與同里王生入深山坎壈以死

張之斗號希垣上元人世襲千戶中萬歷己未武進士累官浙江總兵闖賊陷京師之斗隱居山中不復粒食日採野菜啖之如是十六年子迎歸卒於家

曹臺望字肅應上元人性至孝父病侍湯藥每忘寢食寇亂捐千金倡修城垣嘗夜宿淳化鎮聞鄰人以債迫

棄其妻爲罄貲贖還之

韓國楨字君孺上元人涉江見有負官錢鬻其女者解橐中金爲贖歸之子苑字孟小崇正丙子舉於鄉謁選得吳興教諭甲申國變詣先師廟痛哭挈妻孥歸憂憤成疾瀕死具衣冠北面再拜而逝

陸天眷字錫予溧水人崇正間歲歉捐穀助賑全活甚衆

鄭惟惠高淳人崇正十五年大疫癘載道惟惠出粟賑饑又募粟數百石邑令委賑身雜疋羸間不避穢惡數月遂以病卒

新修江寧府志

卷之三十六

敦行

二十

劉定應字猶龍高淳人性忠介甲申之變仰天號泣如狂惟持謝臯羽鄭所南詩集數卷反覆吟誦絕食而終劉定濟高淳人崇正十六年旱漕糧積欠定濟毅然倡募五千餘金代償之又捐地爲義冢貸穀賑濟徐有文字惟顯高淳人有孝行崇正辛巳歲饑多委溝壑有文施棺埋瘞窮民立券鬻身有文給資使去竟焚其券

陳一科字汝進高淳人崇正元年倡議建萬明墩以關淳邑水利八年呈明永折漕項衆食其德

王馮字杲青芝瑞之子也芝瑞死王事藁葬端州西郊

之梅菴家故赤貧馮徒跣奔迎間關萬里負柩以歸時六合潘公士奇與芝瑞同被難並葬梅菴馮乃載與俱歸方起櫬時見菴側更有兩棺暴牆隅詢之寺僧曰此故廣東直指顧公之俊及其父棺也之俊與芝瑞爲患難交瑞之歿也之俊經紀其喪馮悲感不勝乃葬之俊父於已父之壙葬之俊於潘公之壙各碣其墓而表誌之

王承芳字元美上元人族有死喪時周卹之故人有溺死者歲時呼而奠之卒祀鄉賢祠

武曷號橙墩上元人有才俊富而好學不喜聲利有族

新修江寧府志

卷之三十一

敦行

二十一

人負碧山齊王孫貲千金碧山以空室鎖之且招曷飲曷日族人被囚予豈能自安疾歸謀諸婦出所有服飾爲之代償

俞燈字德華溧水人捐貲六百金築城後圩

唐明德字汝行高淳人有逋糧者代輸之嘗修學宮助建新橋濟親族施棺埋骼弟明學亦有善行

孫璞字國輝高淳人因南蕩圩西北連丹陽湖屢被漂沒璞因倡義捐築長隄十里田無水患

蔣凡江寧人順德府別駕張慙僕也慙在官以馬蹶而墜創甚至不能言將以病歸凡往告於太守曰吾主止

飲順德水耳積貸未償今若此寥落行李請封識以戒
途俾世知吾主之爲清白吏也旣返割股和葯以進哲
飲之漸蘇

黃老人者上元庠生黃清僕也清卒兩子弱不能治其
喪老人爲營祭葬盡禮黃氏貧不能育老人乃出爲傭
每月朔必謁主母問安所得值悉以供餽粥值春秋必
祭於墓上哭主盡哀

增華溧水人劉氏僕也居恒朴野劉氏以常奴畜之崇
正癸酉劉道開補崖州主簿偕其弟及二客二僕往增
華與焉海邦素多瘴癘二客二僕相繼死道開懼遣弟

還而道開亦死獨增華濱死復生泣告於邑之紳宦釀
金若干間關萬里扶五柩歸旣見主母拜且泣襍被蕭
然衣不掩胛出百金奉主母曰此主人積俸也小人未
敢失隊芻觀爲之淚下

國朝胡陽生字復之上元人事母陳氏以孝聞性好學尤
嗜義若渴人有貧乏求之輒應屢應不疲子禹冀順治
乙酉舉人任姑孰教諭教士有聲陞唐山令孫任輿見
後文苑傳倚衡康熙庚辰武進士任越嵩守備處徭獠
錯雜之區綏靖有方

朱之元字龍江上元人以任俠聞嘗游江楚間與左良

玉黃得功友善楊武陵以閣部督師崑山不聽調之元勸之往弗納遂拂袖歸乙亥江右疫作趨治裝往施藥餌棺木活民無算過九江中流颺作之元出賞格募善泐者沿救十全五六後良玉駐江洲復與之元遇酒間語呂督師見疑狀之元曰將軍起行間每戰必克賊人喪膽久矣固當渡河援汴會剿關陝寧以小嫌介意耶良玉嘆服貽米千斛遣卒護之歸道遇饑民盡取以賑之郤貴陽馬士英聘卒於家

邢期仁高淳人明天啟元年饑捐穀二百石助賑崇正甲戌代完積欠錢糧三百兩順治辛卯捐米三十石賑衆仍積穀贍族

新修江寧府志

卷之三十一

敦行

二十二

吳紳字德卿其先歙人祖新祖官南太常卿遂家焉順治己亥贖難婦千數制府郎公設粥廠賑饑紳董其事粟間不給卽出貲佐之自通濟門至華陽古道六十餘里皆紳獨力所修葺

陳漢字西泉上元人當明季時樂善好施計施棺五十餘口棉衣五十餘件置義塚於鳳臺關罄其所有歿時家徒壁立

黃開宗字裕我上元人以孝聞順治間海寇犯金陵有姊居郭外恐不免開宗崎嶇兵刃間迎歸卒脫於難

笱成教字子雨上元人歲饑流亾滿道成教竭力設粥捨棺有貸之金者貧不能償輒焚其券
高車志句容人崇正十三年設廠賑粥見有野死不葬者車志力不能具棺乃每一屍給蘆席二令工往瘞必親詣視瘞畢與錢二百故葬埋無虛冒者子世杰康熙庚午舉於鄉庶弟千子性傲遂以其產盡讓千子慰庶母心有以逋負鬻女者杰輒捐貲代償之著有焦山遺筆浪遊草千餘首
駱圖呈字開一句容人歲壬辰邑大饑圖呈捐米穀設廠爲粥存活甚衆

新修江寧府志

卷之三十六

敦行

二十四

蕭必祺字永吉溧水人順治戊子歲大饑出粟數百斛助賑

張正鸞溧水人順治十六年海寇迫城擄掠嬪女鸞持五百金爲請命賊義而與之悉送還原籍康熙九年水災鸞於蒲塘設廠賑濟

余量字德輔六合人順治己亥海寇爲亂縣無守土官百姓洶洶江路阻隔量乘小舟冒風穿營而渡泣叩制府給榜安民康熙戊申縣東冶浦橋壞量捐貲易之以石不數月橋成同里有唐希憲捐銀一百郝大言捐銀二百以助修焉

劉才茂字光顯六合人順治乙酉知縣曾某難起倉卒
闔邑哀號才茂毅然涉危難挾資而南奉其孥以歸且
贍其家

邢道孝字心之高淳人弟婦少寡孝撫遺孤成立其弟
婦以節著聞順治九年旱捐穀散錢全活甚衆嘗捐貲
助修學宮

陳鳴雲字凌殊高淳人鼎革初敗將方某肆虐道經於
淳雲毅然往餽牛酒且諭以至性淳賴以安

張司午高淳人順治間鄉人被里役之苦午捐貲數百
金代輸之

新修江寧府志

卷之三十一

敦行

二十五

陳鳴廷字汝颺高淳人父鑾仕嶺表卒於官行李蕭然
鳴廷年十二扶襯踰嶺歸葬

黃嘉善上元人孝友樂施有鬻兒完國課者嘉善代贖
之鼎革時婦女多流離每贖還其家有閨秀蒙難令與
已女同居尋送歸鎮江受兵更倡首贖難民數百人中
有產婦又出藥餌及襁褓之物以周之一友無子密托
嘉善二千金友亾嘉善卽覓其弟與壻畀之

黃捷字登三上元人時臬司府縣諸獄久裁獄食囚多
餓斃捷爲經營粥飯每日舖囚必週獄多重繫人皆危
之捷一無疑忌大江燕子磯尤險捷釀資僱水手拯溺

活一人者給銀一兩獲一屍五錢仍給葬埋之具
朱純德字子明上元人念先世自海陵來江寧已三百
餘年生齒日蕃族人或貧乏不能自立乃出橐中金四
千置義田若干畝做范文正公遺法爲宗祠以合之凡
族之婚喪衣食皆取資焉

呂貴祥字御卿上元人嘗早出見婦人與孺子哭甚哀
問之蓋其夫負帑金百兩賣婦以償業受價西人而母
子泣以別也貴祥惻然歸罄所有才及半妻高氏脫簪
珥助焉遂召其夫授之且曰汝宥逋雖完而資生無具
將奈何又貸他人數十金以贈

新修江寧府志

卷之三十六

敦行

二十六

田種義字荆璞上元人往來江淮間敦尚氣節邑中待
以舉火者數百家歲大饑斗粟千錢義復多方存活之
邵御龍字公茂上元人鄉黨有貧乏者必出金贈之遇
人急難事輒排解不畱餘力

蔡時智字玉卿上元人性樂善好施捐金修飲虹橋
呂垓上元人邨有虎爲害嘗捐資召獵人除之又條陳
差役之繁重者於官請示嚴飭歲省四萬金衛軍困漕
項有年垓請以官收官兌積弊頓消
謝文表字士奇上元人初因漕運積弊運戶罹於獄者
近千人文表獨力爲維持乃獲免

汪渤字朝宗上元人性篤孝好義子楨字維周嘗監理普育四堂輯有普育條規楨子文煜字闇先號柏齋以同知効力南河授泗州牧州有淤田重爲民累文煜代爲輸逋詳請蠲免

蔡澤字霖蒼號雪巖上元人鳩江王某家十三棺未厝澤捐百金使營葬焉

周德卿上元人凡不能婚嫁殮葬者皆捐金贈之姪婦朱氏生兩女二十五歲而寡德卿身任贍養爲二女婚嫁成禮朱氏得全節焉

李國琦字闇公上元人於養濟院捐千金以養殘廢聞

新修江寧府志

卷之三十一

敦行

二十七

淮安水患被溺甚多謁太守願輸銀二千助賑時江寧亦荒守移於本邑賑粥琦以非已本意復出二千金賑淮安

王時中字蒼平上元人初貢院狹隘移充於學室兩廡時中慨然捐貲請充號舍於平江府復捐金七十爲聖廟祭祀之費卒祀鄉賢祠

翁與吉字啟吾江寧人幼失怙恃事生母劉盡孝一日適市聞鄰火延宅急歸救視門已火封不可入知母未出輒奔赴火中抱母在室四圍俱燼而此室獨完子之楨倡修南門橋孫士仁亦以孝友好施聞

羅必顯字揚庭江寧人邑有以負債投繯懸而未絕顯爲解救且代償之

張玉衡江寧人性孝友好施里有貧不能自存至鬻子女者悉爲具值贖還

李仍治字元士世居金陵之東鄉邨無他姓仍治於族中婦女守節者衣食以贍之立義學設義糧建宗祠以聚族黨有鬻子女者悉捐貲贖還復爲位置得所

高爵字瑞五上元人與妻何氏事母盡孝子官佑字燦東置義塾十三所贍貧乏掩道芻露骸歲費數千金會邑大饑米價騰貴官佑與姪國紀糴米設廠以賑饑其

新修江寧府志

卷之三十六

敦行

二十八

姪國綱與同里談景白各捐金以助之

羅織袞字子華江寧人嘗捐修新浮橋後積善橋

謝燦字明宇溧水人有捕蛙螺爲生者予之金令易業曰毋戕生命凡興建皆捐貲佐之所貸有不能償輒焚其券

蕭士彥字汝英溧水人歲饑饉里有不舉火者陰蠲助之有鬻妻以償債者士彥代之償且計家口以飼之族有婚喪不給則爲成之

蔡元濬溧水人嘗路拾遺金數百待失金者至還之并却其酬

蕭枝馥字帝欽溧水人捐貲佐遷文廟又捐穀貯社倉
中歲歉倡賑鄉里義之

楊自秀溧水人有孝女袁氏家貧不能上請爲捐貲申
詳卒邀祠祀僕有取心療母者秀嘉其孝放歸養親
李奎鳳字惠麟六合人鄰有王姓鬻子旗下鳳捐貲爲
贖之獨修北門內外大街遇荒捐米五十石

楊明秩高淳人七歲喪父事母盡孝里有鬻妻者明秩
予之金以全其偶

葛至煥字文美高淳人慷慨好施邑當徽宣下流每苦
衝潰煥倡義捐貲以石甃隄百餘丈民至今賴之已未

新修江寧府志

卷之三十一

敦行

二十九

歲祲有句容雷某攜妻孥七人鬻於途煥憫之賃屋使
居且周以薪米

夏一湧字淳陽高淳人幼失怙恃殯葬成禮有客販米
百餘石湧見里中乏食卽代借分給不取其券明年鬻
田以償之

谷大寶高淳人以好施盡家業自縣治自滄溪十五里
途圯寶捐資修之

邢襄字文煥高淳人官江陰訓導士貧乏者分俸錢給
之因奉檄驗荒以勞疾卒

谷憲德高淳人淳邑疫作德持藥餌糜粥存問族黨

職員伍嘉炳字君璽江寧人康熙三十五年歲歉不惜重貲樂施助賑三十八年因出城男婦肩輿關胥借查貨物必揭簾搜看轎匱嘉炳具呈籲請得免鄉黨稱之甘繼棟高淳人捐金修學宮又修新橋捐義田六十餘畝出穀百石置義倉以贍族人

谷長庚字幼白高淳人順治十五年高淳丹陽湖草場爲丹塗所侵邑人歲賠平米一百五十餘石庚首請於當事歷十載始復淳業計一千七百餘畝

周蘭孫高淳人邑有糧正因糧濕坐法蘭孫代償之何允謙上元人康熙乙卯舉人聞鄰舟女子夜啼問之

新修江寧府志

卷之三十一

敦行

三十

知因父累官帑千金繫獄願賣身以贖父者謙罄橐中金助之以周其事女與父得相依而歸後官婺邑教諭張光臣字公輔號敬庵上元人故與浙江巡撫趙一麟淮徐監司項犀水相友善初趙甚貧歲薦名當出光臣後光臣故誑誤不與試趙遂得前貢項任監司以兼金寄於光臣且語之有急卽自取用光臣素貧無旦夕儲終不一視項歸以原櫝還之康熙己卯選高平訓導癸卯陞隆平教諭高邑歲稔捐俸賑濟

笄晉佑字裕昆句容人康熙甲午歲饑出麥賑鄉里每口日給一升閱三月乃止遇荒必捐穀先後凡四設賑

焉

周尙直字天如句容人康熙己未荒出粟米賑鄉鄰有魯隆者饑寒將委溝壑直月給麥米以贍之隆被戚屬株連將鬻妻於營兵復捐金保其夫婦

黃嘉謨句容人康熙三十五年大水居民漂沒謨爲具棺收殮四十七年又水謨買穀平糶存活者衆

駱友麟字五修句容人康熙戊午夏大旱麟倡議平糶又多方廣貯米石以待秋成有鬻女其家者麟適他出歸而詢女之父則舊所識也卽送還不索直而厚贈之蕭士經溧水人性孝友慷慨好義如學宮明倫堂尊經

新修江寧府志

卷之三十一

敦行

三十一

閣積慶橋以及歲稔賑饑皆捐貲首爲之倡卒祀節義祠

王漢卿六合人業賣磚瓦康熙五十三年竭力修南門後街費百餘金歲荒爲麵餅以啖饑民

吳偉字尊一高淳人邑苦里役苛索偉毅然與同里丁煒及邑中氣誼之士陳言大吏自與丁煒鬻產以周其用赴愬展轉十年始得革除偉之子霆字商巖時已去里役後令至思稍稍變通意霆可左右也霆憤然曰悖誣先人不孝以民創痛諛令不義峻拒之其後劍津陳令治淳復修加派之役霆又呈請罷之丁煒字寅先邑

庠生邑又有陳際會谷淮者亦與吳偉丁煒同倡革除里役之議

趙近涿字祖生高淳人康熙戊子己丑間歲荒疫大作涿助賑施藥且給棺瘞埋暴露

周昌祐字兩宜高淳人康熙戊子大水相國圩當徽宣之衝祐率衆援救捐費三百餘金

邢必慶字佑徵高淳人康熙乙酉至戊子螟蝻之餘繼以水潦必慶出粟賑饑不下千石捐良田五百畝爲本族義倉以周窮困至修文廟革里排皆與力焉

唐九來字儀生高淳人捐貲修學宮建文星閣康熙乙

新修江寧府志

卷之三十一

敦行

三十一

酉螟戊子水捐穀數百石賑饑

王之瓊字瑤先高淳人康熙丙戌螟邑令委以賑事粟有紅朽則出已粟易之戊子水鬻產市粟以給里人李見龍高淳人性好施與康熙乙丑歲大饑見龍罄家所藏粟賑饑全活窮民甚衆

陳悅忠字良如高淳人嘗捐資建文昌閣康熙四十七年歲稔買粟賑濟戊子邑大水太平橋圯忠捐貲修建之己丑歲又荒流亾載道忠捐義山四畝捨棺埋瘞王轍字文懷句容人事繼母至孝代兄納糧五十餘年爲兄子娶婦復迎養寡姊月給舅氏薪米營其祭葬周

恤貧乏久而不衰

湯選字銓掌句容人賑饑平糶以及育嬰施綿諸事共捐銀三千四百兩

駱嘉言句容人嘗完人婚娶助人喪葬修學校葺橋梁凡有利於鄉里者無不盡言人多陰受其澤

張英字千子上元人會甲寅逆藩爲變豫閩越三省婦女流離播遷江寧城內者數百人英倡捐與贖還籍吳永錫號敬庵上元人嘗設救生船施藥療疫多所存活置義田數百畝以贍族人捐貲千金於普育兩堂以佐堂費

新修江寧府志

卷之三十一

敦行

三十三

高尚賓字瑞生上元人性好施與子文廣值鎮江兵燹倡首贖難婦千人歲暮擔錢給貧民於路不告姓名程應文字爾華性敦孝友曾建橋於王后山側值歲歉輒免農人分租

杜宏字爾文上元人任西寧茶馬大使致仕歸康熙乙丑大疫立醫社施丸散鄉人賴以存活又立義塚於惠應寺側

王琮字若玉上元人客京江聞母病急歸會風浪大作舟覆漂流江中三日夜不死嘗建宗祠置義田百餘畝以贍族

尹文元字祥宇上元人時六合鄉民有少女因海寇擄掠散失父母文元遂攜之歸爲婚嫁如已女又於七里洲拾遺金俟其人至還之

芮秉理字斯玉上元人嘗客山東值歲饑傾囊爲粥以賑之居鄉里嘗施棺木給綿衣凡里有不能嫁娶殯葬者皆周卹之

錢應忠字蓋臣上元人嘗修天闕大路埋枯骨數十冢焚借券累千金

馬埏字輿圖上元人父以幕遊粵東卒埏甫冠負骸歸里營葬盡禮嘗與弟坦之越有同舟者遺金數百兩昆

新修江寧府志

卷之三十六

敦行

三十四

季俟其人返還之

楊遇春字乾生上元人養親以孝聞倡義蠲賑又建塚數所以掩枯骨

王陽葵句容人事繼母如所生嘗積穀二千石別儲一倉以給鄉里之貧乏子階組官州同知遇歲歉自捐濟外每日炊飯必多八米數斛凡遠近之無賑者悉就食焉孫廷璟廷玠嘗修建學宮平道路治橋梁賑饑育嬰先後捐銀三千七十餘兩

駱維寧字謐如號靜庵句容人歲大饑米價騰貴寧泛舟彭蠡糴米以下仿社倉法給米饑民一鄉免爲流莩

康熙丙子歲大水漂溺廬舍人口無算寧設巨筏拯救全活甚衆其無主骸骨令人以布裹之悉爲埋瘞子曰俞字帝然雍正丙戌歲饑捐金五百買米平糶著有偶然草詩集

蕭克紘溧水人周恤族里歲寒有典衣不能取者代取給之卒歲每餽貧民薪米不令人知

武孔牆溧水人族中梁氏未婚守節牆爲立後常周恤之有孤貧不能娶者給貲使娶又設義學於西蒲里嘗著學聖論諸篇

邢之鵬字五雲高淳人性孝友好施捐大宗田四十畝

新修江寧府志

卷之三十一

敦行

三十五

以周宗族捐小宗田三十餘畝以恤親戚人捐田一百畝置義倉以賑鄉里

孔鐸字振鐸高淳人捐貲助修漆橋歲浸出粟賑饑

王輅字重先高淳人事母孝母年逾八旬邁疾七年輅嘗藥視膳罔間兄輔年八十餘衣服酒漿必敬奉之生平慷慨好施康熙戊子圩破輅質產濟貧

李公國字寧魯高淳人少孤曲體母志家素貧母好施與公國多方順承略無難色子居祺亦以孝聞

孫范高淳人字叔舉嘗與吳偉丁煒等請革里排宿弊一切條陳悉出其手晚耽詩歌著有愚谷詩草

孔楷字殷潢高淳人性孝友嘗捐貲修戟門重建櫺星門康熙丙寅湖水衝突田圩幾決楷捐金數百購木障土護堤并攜酒食以勞役人是秋稱大有年戊子邑大侵出穀給族里又請於當事賑濟存活甚衆

陳復鼎字凝章高淳人親族不能婚嫁者助之邑有以貧鬻妻者其家三世一身子甫週睟泣不肖離復鼎出金貲之俾完其偶

邢景慶字天儒高淳人嘗修學宮戊子大水圩破捐米百石助賑又出穀三百石以周本族

曹會炳字淑燦高淳人固城湖東趕羊石其峯甚銳屢

新修江寧府志

卷之三十六

敦行

三十六

破行艘術者謂去其峯者身必受殃會炳結里人夏鼎班倡募鳩工竟削平之

葛自亮高淳人自縣治抵龍溪鎮三十里地苦泥濘亮捐貲二千五百餘金修之子廷簡雍正丙午歲大侵出千金賑饑又倡修文廟捐設義倉

黃爾玉江浦人性好施與捐置義塚瘞埋暴露雍正間捐貲修建橋梁行旅便之

湯祖耄字同壽高淳人雍正二年邑大饑家僅有田二十八畝遂罄所有以助賑焉

王成才字永康句容人事母以孝聞族人王漢卿以貧

死妻將攜子他適成才治屋使居且贍養之卒全其節
雍正六年客遊漢江聞鄰舟呼號甚慘才令舟人疾往
援救舟已沉溺遂出金贈之使歸嘗捐貲修建萬壽橋
行旅誦之

張岫江浦人捐田三十餘畝助開朱家山河

趙永正字乾初句容人事親以孝聞捐貲獨建蘆亭邨
大橋尤好施與

談禮江寧人家不甚富而好行其行其恤貧乏也久而
不衰子仕龍字雨蒼亦能以善行繼其父志後又有高
善人萬泉者少貧性亦喜施與而家以漸殷其所爲悉

新修江寧府志

卷之三十一

敦行

三十七

以談善人所爲爲之準請於有司置全嬰所二區又謂
嬰兒之育於他人終不若育於其母之爲真切也有貧
而欲弃其子者又按月給食以資之歲費數千緡

葉宏直溧水人自邑至省通衢捐數千金俱礪以石城
南至洪藍埠十五里亦如之

嚴時泰溧水人因葉宏直礪洪藍埠路恐日久圯壞捐
買近路田四十餘畝逐年取息修補

劉遵之江浦人少孤力擔負以養母因疾就醫金陵拾
遺金二百俟其人至還之

楊宗應字永錫江浦人年十七爲海寇所劫見獲二女

宗應恐爲寇所污匿而脫之賊八其家饋之金使去
許之雲高淳人順繼母出妻兩置義塚子聖榮孝繼母
如之歲饑減價糶穀告貸者悉焚其券孫士宗添設義
塚山邑有苦辛圩當湖水之衝幾至潰決士宗築隄衛
之曾孫廷梅亦以孝義聞

夏嘉高淳人執喪致哀嘗施蚊帳綿衣歲暮輒出粟給
族中貧乏

楊錡字升若江寧人捐職州同父以寧官肇慶府坐事
謫戍張家口四十五台錡請以本職隨往軍前効力時
雍正十二年也錡遂在北路十五台屢立戰功嘗以鉄

新修江寧府志

卷之三十一

敦行

三十八

棍掃兇逆數百人十四台皆賴以安尋以父疾請於大
將軍平郡王福彭願終身效力免父八口治病呈八九
上而不獲行其父遂以乾隆元年卒於戍所是時錡以
軍功已邀議敘大將軍欲挽留之錡竟決計棄官扶柩
南還道經黑水河柩甫抵岸驟忽蹶柩將傾於河錡亟
以胸挺柩得不落水錡骨折嘔血錡性沉毅常慷慨急
人難悼父之以剛直獲戾也不樂仕進卒於家

汪湘字九畹句容人乾隆戊午邑大饑力請當事設廠
平糶捐金賑濟辛酉復災議捐如故又修葺學宮建泮
池牌坊

彭象晉字錫蕃六合人性孝友好施弟象復字正希乾隆六年邑大水賃船援濟活二百餘人二十一年大饑米石三千緡有奇象復傾困得米四千石減半價出糶焉三十一年獨修崇聖祠三十五年春荒象復捐賑銀二千兩置義田五百畝創立宗祠以贍族人

朱潔字漪清六合人州同兩次捐貲助修學宮乾隆四十年旱捐米一百石賑饑

鄭仕朝六合人家素貧乾隆六年邑大水賃船救濟全活甚衆

竺銳六合人乾隆二十年大饑捐賑銀三百三十兩

新修江寧府志

卷之三十一

敦行

三十九

陸又賈江寧人其祖永宏亦好施與又賈性慷慨仗義里有王和羹妾周氏守節初其子王世培已與王門吳貞女爲嗣迨周氏貧不能支族人謀嫁之氏將自盡又賈切責其族人亟送周與吳貞女同居並贍養之旅人歐士龍貧病無歸將赴水死又賈館之於家養之終身每屆歲暮輒賃舟沿江巡視見有赴水者輒拯救之乾隆五十年大荒又賈首倡捐穀賑饑全活甚衆

毛恒武江浦人乾隆二十年邑大水瓦廟橋壞武獨捐貲重建嘗置義塚鄉里稱之

朱希洛字揆文江寧人父疾每夜籲天求代叩頭血出

潰磚甃性尤好施與乾隆癸巳丙午大饑出粟濟人賴以存活者甚衆捨棺殯殮者數百人嘗有借貸不能償者察其人有慙色因太息曰奈何以細故使人抱隱愧耶立召諸貧者至悉焚其券歿後有加息以償而其子茫然不敢受者弟希灝亦有善行

華廷彩字雲衢句容人乾隆乙巳秋邑大饑鬻產典衣以恤宗族丙午春大疫施藥餌捨棺殯殮家以日貧劉錦字西彩句容人性孝友好施乾隆四十年五十年邑皆大荒錦捐貲卹本族窮民來告者雖鬻產必有以應之

新修江寧府志

卷之三十一

敦行

四十

裴珏字雋駢句容人性孝友兄球早歿珏撫姪鈐暨鑑如已生迨鈐受室珏哭告兄靈曰鈐受室鑑入學則又哭告曰鑑入學居恒尤好施與著有醫粹二卷

王映槐字煥章高淳人嘗修三元橋至下壩官路乾隆三十四年歲大饑捐粟二百石賑濟四十年又捐粟四百石

陳槿字光甫句容人鄰有張姓欠賦不勝追比將鬻妻以償槿爲代償之乾隆四十六年捐金二百修綠楊橋五十年歲稔槿出家貲濟族之貧乏者復捐金二百設廠賑粥五十三年邑又荒槿又捐金四百散給窮民

朱本智六合人乾隆四十年歲饑捐賑五十年大饑家儲粟百餘石區分爲四以三遺族黨以一自贍日僅具餽粥曰吾不敢獨飽也友人某無子本智爲之置妾生一子而卒妾以孤苦將他適本智竭力養贍之曰吾不忍負吾亾友也妾爲感泣卒全其節

王周南句容人助修尊經閣及明倫堂乾隆四十年五十年歲皆大荒倡捐賑濟

朱葆川字銘西句容人性孝友樂施邑有新昌橋爲上元溧水兩邑之通衢又爲白米圩及百丈圩數萬畝之保障乾隆二十八年橋圯葆川捐金倡議修建之

新修江寧府志

卷之三十一

敦行

四十一

濮蘭芳溧水人乾隆五十年大饑變產捐賑計口散給賴以生全者數百家

王國泰江浦人乾隆己巳歲饑出粟賑恤鄉里全活甚多嘗置義塚施藥濟貧

程京萼字韡老一字菴齋金陵人深於古學善書家貧事母以孝聞嘗言窮約其身者得爲良士窮約其親者不得爲孝子人言讀書有得則必据以治心治事耻爲空言織造曹棟亭求見京萼京萼聞其疎於禮貌不往又嘗遣所親謂曰誠能爲我假託董華亭墨蹟當任其終歲之計京萼辭以不能作僞曹聞而憚之居恒惟以

終始如一表裏無二二語自勗著有金陵祀典

王裕字成公號大江金陵人博學善屬文豪邁不羈事母以孝聞嘗爲母滌褻器客過之終事而後揖客無忤容著有孟莊軼事

王禧字元社號澹餘金陵人性沉警事母以孝聞弟祚卒撫姪傒服成名傒服字兩蘇家貧而性豪宕每冬日無綈袍間日不舉火及見客笑傲自若或有以一介非義至者必峻拒之工詩賦古文

魏文貴字錦章六合人修大東門至冶浦橋下官街置黃泥山義塚一區

新修江寧府志

卷之三十六

敦行

四十二

劉世璵字荆玉六合人捐貲助修學宮易查家木橋以石行旅便之

周斌字有用高淳人嘗謂不爲良臣必爲良士兄某被誣坐法陷獄斌日夜思維伸救無策會歲暮母泣涕冀一見兄面斌乃赴縣求代當事憐其誠俾之暫代且諭其兄見母後卽還斌旣入獄恐其兄復至遂自盡於獄中

王葑字躍門號南溟上元人事母以孝聞有族人利其貲產常以利刃伺之及族人貧且死葑與之屋舍衣食及殮葬之具皆備已復嫁其孤女焉

王嘉謨江浦人邑令創建珠江書院嘉謨捐銀一千兩
伍浩字少西前明神宗時人屢捐費助賑曾蒙旌獎有
高義二字今石坊猶建墓側

伍士祿少西六世孫樂善好施稟承祖訓常修林家岡
至麻田大路閱今六十年道路平坦行人頌之

陳圻字坦園一字蘭邨其先自山陰徙家江寧事母以
孝聞家素貧母寄食於姻黨以饑驅不常侍顏色客舍
中見飛鳥過庭淒然自傷爲反哺烏詩母後家居雖供
養盡歡常斥去不食圻乃以金遺姻戚設饌遺母母聞
而哀之爲加餐母歿設主於室出入必衣冠至前朝夕

新修江寧府志

卷之三十一

敦行

四十二

置饋必舉手呼父母如是者終其身常欲結廬墓側嫌
以駭物振奇乃寫放瑩兆貌已立於側名其圖曰想廬
遂號想廬居士

葉恒福字萬和江寧人歲浸輒散積米以周貧乏乾隆
乙巳大饑福首捐千金助賑

周超字曰庠高淳人乾隆甲申鳳陽水災流民至邑有
殷某宋某攜妻孥鬻於途超賃屋使居且周其薪米乾
隆己丑歲饑出粟二百石賑濟

張祥盛江寧人七歲而孤母不堪貧憂形於色祥盛常
跪母前號哭願爲傭以慰母母爲感泣未幾家漸裕歲

終每施錢米并散褐衣

陶廣字丙南上元人族黨有貧乏者歲給錢米乾隆五
十一年歲大侵廣共捐銀一千五百兩助賑

劉應煦字萬育性慷慨好義捐設鎮江救生船乾隆戊
午捐賑壬戌歲大荒又捐千金濟饑鄉里賴以全活同
里劉士堯字宗唐亦於乾隆乙酉乙未兩年捐賑

趙有光字允裕句容人乾隆五十年大饑設粥於家以
待餓人越半載乃止五十二年黃梅橋岷光獨捐貲修
建之夏之德六合人養寡姊及寡嫂郭氏俾得全節性
尤慷慨好義鄉里稱善焉

新修江寧府志

卷之三十一

敦行

四十四

笄彝笄琦皆句容人乾隆己未歲饑彝捐貲賑濟乙亥
戊子歲饑琦頻捐賑鄉里義之

顧葉林江浦人性肫摯篤學事親以孝聞父卒哀毀三
載不離殯所母歿亦如之每食必設父母位久而不懈
姚尚廉江浦人事母以孝聞尤慷慨好施鄉里義之
唐甫臣高淳人歲饑減價糴米施棺給貧購石捐築城
圩以禦湖浪修學宮育英集賢二橋鄉里稱善焉

林筠字个邨上元人少孤力學事母以孝聞嘗寓楚邸
有奔女拒之不去筠引佩刀自刺其女驚逸歲歉賑饑
年六十四卒著有雉膏詩集

傅兆璜溧水人乾隆三十二年邑水災兆璜家非素豐
罄所有出穀百餘石爲粥以賑人後二年復大饑又出
穀數十石爲粥賑人知縣劉贈以匾曰爲善於鄉知縣
李亦贈以匾曰比爲仁者後延爲鄉飲大賓

